

Mahanarayana Upanishad with Vedic Accent

——
महानारायणोपनिषत् सस्वराः

——
Document Information



Text title : Mahanarayana Upanishad with Vedic Accent

File name : mahAnArAyaNopaniShatsasvarA.itx

Category : upanishhat, narayana, svara

Location : doc_upanishhat

Author : Vedic Tradition

Transliterated by : Sunder Hattangadi Mandar Mali

Proofread by : Sunder Hattangadi, Mandar Mali aryavrutta at gmail.com

Description-comments : 18/108; Krishna YajurVeda, Vaishnava Upanishad, Taittiriya Aranyaka. Strictly not in 108 mentioned in Muktika upanishad.

Latest update : August 13, 2023

Send corrections to : sanskrit@cheerful.com


This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

Please help to maintain respect for volunteer spirit.

Please note that proofreading is done using Devanagari version and other language/scripts are generated using **sanscript**.

August 14, 2023

sanskritdocuments.org



महानारायणोपनिषत् सस्वराः



शान्तिपाठः ।

हरिः ॐ ॥ शं नो मित्रः शं वरुणः । शं नो भवत्यर्यमा ।

शं न इन्द्रो बृहस्पतिः । शं नो विष्णुरुक्रमः ॥

नमो ब्रह्मणे । नमस्ते वायो । त्वमेव प्रत्यक्षं ब्रह्मासि ।

त्वामेव प्रत्यक्षं ब्रह्म वदिष्यामि । ऋतं वदिष्यामि ।

सत्यं वदिष्यामि । तन्मामवतु । तद्वक्तारमवतु ।

अवतु माम् । अवतु वक्तारम् ॥

ॐ शान्तिः शान्तिः शान्तिः ॥

ॐ सह नाववतु । सह नौ भुनक्तु । सह वीर्यं करवावहे ।

तेजस्वि नावधीतमस्तु । मा विद्विषावहे ।

ॐ शान्तिः शान्तिः शान्तिः ॥

प्रथमोऽनुवाकः ।

अम्भस्यपारे भुवनस्य मध्ये नाकस्य पृष्ठे महतो महीयान् ।

शुक्रेण ज्योतींषि समनुप्रविष्टः प्रजापतिश्चरति गर्भे अन्तः ॥ १॥

यस्मिन्निदं सं च वि चैति सर्वं यस्मिन् देवा अधि विश्वे निषेदुः ।

तदेव भूतं तदु भव्यमा इदं तदक्षरे परमे व्योमन् ॥ २॥

येनावृतं खं च दिवं महीं च येनादित्यस्तपति तेजसा भ्राजसा च ।

यमन्तः समुद्रे कवयो वयन्ति यदक्षरे परमे प्रजाः ॥ ३॥

यतः प्रसूता जगतः प्रसूती तोयेन जीवान् व्यचसर्ज भूम्याम् ।

यदोषधीभिः पुरुषान् पशूँश्च विवेश भूतानि चराचराणि ॥ ४॥

अतः परं नान्यदणीयसं हि परात्परं यन्महतो महान्तम् ।

यदेकमव्यक्तमनन्तरूपं विश्वं पुराणं तमसः परस्तात् ॥ ५॥
 तदेवर्तं तदु सत्यमाहुस्तदेव ब्रह्म परमं कवीनाम् ।
 इष्टापूर्तं बहुधा जातं जायमानं विश्वं विभर्ति भुवनस्य नाभिः ॥ ६॥
 तदेवाग्निस्तद्वायुस्तत्सूर्यस्तदु चन्द्रमाः ।
 तदेव शुक्रममृतं तद्ब्रह्म तदापः स प्रजापतिः ॥ ७॥
 सर्वे निमेषा जज्ञिरे विद्युतः पुरुषादधि ।
 कला मुहूर्ताः काष्ठाश्चाहोरात्राश्च सर्वशः ॥ ८॥
 अर्धमासा मासा ऋतवः संवत्सरश्च कल्पन्ताम् ।
 स आपः प्रदुधे उभे इमे अन्तरिक्षमथो सुवः ॥ ९॥
 नैनमूर्ध्वं न तिर्यञ्चं न मध्ये परिजग्रभत् ।
 न तस्येशे कश्चन तस्य नाम महद्यशः ॥ १०॥
 न संदृशे तिष्ठति रूपमस्य न चक्षुषा पश्यति कश्चनैनम् ।
 हृदा मनीषा मनसाभिकृप्तो य एनं विदुरमृतास्ते भवन्ति ॥ ११॥
 परमात्म - हिरण्यगर्भ - सूक्तम्
 अद्भ्यः सम्भूतो हिरण्यगर्भ इत्यष्टौ ॥
 अद्भ्य सम्भूतः पृथिव्यै रसाच्च, विश्वकर्मणः समवर्तताधि ।
 तस्य त्वष्टा विदधद्रूपमेति, तत्पुरुषस्य विश्वमाजानमग्रे ॥ १॥
 वेदाहमेतं पुरुषं महान्तम्, आदित्यवर्णं तमसः परस्तात् ।
 तमेवं विद्वानमृत इह भवति, नान्यःपन्था विद्यतेऽयनाय ॥ २॥
 प्रजापतिश्चरति गर्भे अन्तः, अजायमानो बहुधा विजायते ।
 तस्य धीराः परिजानन्ति योनिम्, मरीचीनां पदमिच्छन्ति वेधसः ॥ ३॥
 यो देवेभ्य आतपति, यो देवानां पुरोहितः ।
 पूर्वो यो देवेभ्योजातः, नमो रुचाय ब्राह्मये ॥ ४॥
 रुचं ब्राह्मं जनयन्तः, देवा अग्रे तदब्रुवन् ।
 यस्त्वैवं ब्राह्मणो विद्यात्, तस्य देवा असन् वशे ॥ ५॥
 हीश्च ते लक्ष्मीश्च पत्न्यौ, अहोरात्रे पार्श्वे, नक्षत्राणि रूपम् ।

अश्विनौ व्यात्तम्, इष्टं मनिषाण, अमुं मनिषाण, सर्वं मनिषाण ॥ ६॥

इति उत्तरनारायणानुवाकः ।

हिरण्यगर्भः समवर्तताग्रे, भूतस्य जातः पतिरेक आसीत् ।

स दाधार पृथिवीं द्यामुतेमां कस्मै देवाय हविषा विधेम ॥ १॥

यः प्राणतो निमिषतो महित्वैक इद्राजा जगतो बभूव ।

य ईशे अस्य द्विपदश्चतुष्पदः कस्मै देवाय हविषा विधेम ॥ २॥

य आत्मदा बलंदा यस्य विश्व उपासते प्रशिषं यस्य देवाः ।

यस्य छायामृतं यस्य मृत्युः कस्मै देवाय हविषा विधेम ॥ ३॥

यस्येमे हिमवन्तो महित्वा यस्य समुद्रं रसया सहाहुः ।

यस्येमाः प्रदिशो यस्य बाहू कस्मै देवाय हविषा विधेम ॥ ४॥

यं क्रन्दसी अवसा तस्तभाने अस्वैक्षेतां मनसा रेजमाने ।

यत्राधि सूर उदितौ व्येति कस्मै देवाय हविषा विधेम ॥ ५॥

येन द्यौरुग्रा पृथिवी च दृढे येन सुवः स्तभितं येन नाकः ।

यो अन्तरिक्षे रजसो विमानः कस्मै देवाय हविषा विधेम ॥ ६॥

आपो ह यन्महतीर्विश्वमायं दक्षं दधाना जनयन्तीरग्निम् ।

ततो देवानां निरवर्ततासुरेकः कस्मै देवाय हविषा विधेम ॥ ७॥

यश्चिदापो महिना पर्यपश्यदक्षं दधाना जनयन्तीरग्निम् ।

यो देवेशधि देव एक आसीत् कस्मै देवाय हविषा विधेम ॥ ८॥

एष हि देवः प्रदिशोऽनु सर्वाः

पूर्वो हि जातः स उ गर्भे अन्तः ।

स विजायमानः स जनिष्यमाणः

प्रत्यङ्गुखास्तिष्ठति विश्वतोमुखः ॥ १२॥

विश्वतश्चक्षुरुत विश्वतोमुखो विश्वतोहस्त उत विश्वतस्यात् ।

सं बाहुभ्यां नमति सं पतत्रैर्द्यावापृथिवी जनयन् देव एकः ॥ १३॥

वेनस्तत् पश्यन् विश्वा भुवनानि विद्वान् यत्र विश्वं भवत्येकनीडम् ।

यस्मिन्निदं सं च वि चैकं स ओतः प्रोतश्च विभुः प्रजासु ॥ १४॥

प्र तद्वोचे अमृतं नु विद्वान् गन्धर्वो नाम निहितं गुहासु ।
 त्रीणि पदा निहिता गुहासु यस्तद्वेद सवितुः पिता सत् ॥ १५ ॥
 स नो बन्धुर्जनिता स विधाता धामानि वेद भुवनानि विश्वा ।
 यत्र देवा अमृतमानशानास्तृतीये धामान्यभ्यैरयन्त ॥ १६ ॥
 परि द्यावापृथिवी यन्ति सद्यः परि लोकान् परि दिशः परि सुवः ।
 ऋतस्य तन्तु विततं विचृत्य तदपश्यत् तदभवत् प्रजासु ॥ १७ ॥
 परीत्य लोकान् परीत्य भूतानि परीत्य सर्वाः प्रदिशो दिशश्च ।
 प्रजापतिः प्रथमजा ऋतस्यात्मनात्मानमभिसम्बभूव ॥ १८ ॥
 सदसस्पतिमद्भुतं प्रियमिन्द्रस्य काम्यम् ।
 सनि मेधामयासिषम् ॥ १९ ॥
 उद्दीप्यस्व जातवेदोऽपग्नन्निऋतिं मम ।
 पशूँश्च मह्यमावह जीवनं च दिशो दिश ॥ २० ॥
 मा नो हिँसीञ्जातवेदो गामश्वं पुरुषं जगत् ।
 अबिभ्रदग्न आगहि श्रिया मा परिपातय ॥ २१ ॥
 पुरुषस्य विद्म सहस्राक्षस्य महादेवस्य धीमहि ।
 तन्नो रुद्रः प्रचोदयात् ॥ २२ ॥
 तत्पुरुषाय विद्महे महादेवाय धीमहि ।
 तन्नो रुद्रः प्रचोदयात् ॥ २३ ॥
 तत्पुरुषाय विद्महे वक्रतुण्डाय धीमहि ।
 तन्नो दन्तिः प्रचोदयात् ॥ २४ ॥
 तत्पुरुषाय विद्महे चक्रतुण्डाय धीमहि ।
 तन्नो नन्दिः प्रचोदयात् ॥ २५ ॥
 तत्पुरुषाय विद्महे महासेनाय धीमहि ।
 तन्नः षण्मुखः प्रचोदयात् ॥ २६ ॥
 तत्पुरुषाय विद्महे सुवर्णपक्षाय धीमहि ।

तन्नो॑ गरुडः प्रचो॒दयात् ॥ २७॥

वेदा॑त्मनाय॒ विद्महे॑ हिरण्यग॒र्भाय॑ धीमहि ।

तन्नो॑ ब्रह्म प्रचो॒दयात् ॥ २८॥

नारा॑यणाय॒ विद्महे॑ वा॒सुदे॒वाय॑ धीमहि ।

तन्नो॑ विष्णुः प्रचो॒दयात् ॥ २९॥

वज्र॑नखाय॒ विद्महे॑ तीक्ष्णद॒ष्ट्राय॑ धीमहि ।

तन्नो॑ नारसि॒ंहः प्रचो॒दयात् ॥ ३०॥

भा॒स्क॒राय॑ विद्महे॑ महद्भु॒तिक॒राय॑ धीमहि ।

तन्नो॑ आदित्यः प्रचो॒दयात् ॥ ३१॥

वैश्वान॑राय॒ विद्महे॑ लाली॒लाय॑ धीमहि ।

तन्नो॑ अग्निः प्रचो॒दयात् ॥ ३२॥

का॒त्या॒य॒नाय॑ विद्महे॑ कन्याकु॒मारि॑ धीमहि ।

तन्नो॑ दुर्गिः प्रचो॒दयात् ॥ ३३॥

पाठभेदः

चतुर्मुखाय विद्महे कमण्डलुधराय धीमहि ।

तन्नो ब्रह्मा प्रचोदयात् ॥

आदित्याय विद्महे सहस्रकिरणाय धीमहि ।

तन्नो भानुः प्रचोदयात् ॥

पावकाय विद्महे सप्तजिह्वाय धीमहि ।

तन्नो वैश्वानरः प्रचोदयात् ॥

महाशूलिन्यै विद्महे महादुर्गायै धीमहि ।

तन्नो भगवती प्रचोदयात् ॥

सुभगायै विद्महे कमलमालिन्यै धीमहि ।

तन्नो गौरी प्रचोदयात् ॥

नवकुलाय विद्महे विषदन्ताय धीमहि ।

तन्नः सर्पः प्रचोदयात् ॥

सहस्रपरमा देवी शतमूला शताङ्कुरा ।
सर्वं हरतु मे पापं दूर्वा दुःस्वप्ननाशिनी ॥ ३४ ॥
काण्डात् काण्डात् प्ररोहन्ती परुषः परुषः परि ।
एवा नोदूर्वे प्रतनु सहस्रेण शतेन च ॥ ३५ ॥
या शतेन प्रतनोषि सहस्रेण विरोहसि ।
तस्यास्ते देवीष्टके विधेम हविषा वयम् ॥ ३६ ॥
अश्वक्रान्ते रथक्रान्ते विष्णुक्रान्ते वसुन्धरा ।
शिरसा धारयिष्यामि रक्षस्व मां पदे पदे ॥ ३७ ॥
भूमिर्धनुर्धरणी लोकधारिणी ।
उद्धृतासि वराहेण कृष्णेन शतबाहुना ॥ ३८ ॥
मृत्तिके हन मे पापं यन्मया दुष्कृतं कृतम् ।
मृत्तिके ब्रह्मदत्तासि काश्यपेनाभिमन्त्रिता ।
मृत्तिके देहि मे पुष्टिं त्वयि सर्वं प्रतिष्ठितम् ॥ ३९ ॥
मृत्तिके प्रतिष्ठिते सर्वं तन्मे निर्णुद मृत्तिके ।
त्वया हृतेन पापेन गच्छामि परमां गतिम् ॥ ४० ॥
यत इन्द्र भयामहे ततो नो अभयं कृधि ।
मघवच्छग्धि तव तन्न ऊतये विद्विषो विमृधो जहि ॥ ४१ ॥
स्वस्तिदा विशस्पतिर्वृत्रहा विमृधो वशी ।
वृषेन्द्रः पुर एतु नः स्वस्तिदा अभयङ्करः ॥ ४२ ॥
स्वस्ति न इन्द्रो वृद्धश्रवाः स्वस्ति नः पूषा विश्ववेदाः ।
स्वस्ति न स्ताक्षर्यो अरिष्टनेमिः स्वस्ति नो बृहस्पतिर्दधातु ॥ ४३ ॥
आपान्तमन्युस्तृपलप्रभर्मा धुनिः शिमीवाञ्छरुमा ऋजीषी ।
सोमो विश्वान्यतसावनानि नार्वागिन्द्र प्रतिमानानि देभुः ॥ ४४ ॥
ब्रह्मजज्ञानं प्रथमं पुरस्ताद्वि सीमतः सुरुचो वेन आवः ।
स बुध्निया उपमा अस्य विष्ठाः सतश्च योनिमसतश्च विवः ॥ ४५ ॥
स्योना पृथिवि भवान् नृक्षरा निवेशनी ।

यच्छा नः शर्म सप्रथाः ॥ ४६॥

गन्धद्वारां दुराधर्षां नित्यपुष्टां करीषिणीम् ।

ईश्वरीं सर्वभूतानां तामिहोपह्वये श्रियम् ॥ ४७॥

श्रीर्मे भजतु, अलक्ष्मीर्मे नश्यतु ।

विष्णुमुखा वै देवाश्छन्दोभिरिमाँल्लोकाननपजय्यमभ्यजयन् ।

महा इन्द्रो वज्रबाहुः षोडशी शर्म यच्छतु ॥ ४८॥

स्वस्ति नो मघवा करोतु । हन्तु पाप्मानं योऽस्मान् द्वेष्टि ॥ ४९॥

सोमान् स्वरणं कृणुहि ब्रह्मणस्पते, कक्षीवन्तं य औशिजम् ।

शरीरं यज्ञशमलं कुसीदं तस्मिन्त्सीदतु योऽस्मान् द्वेष्टि ॥ ५०॥

चरणं पवित्रं विततं पुराणं येन पूतस्तरति दुष्कृतानि ।

तेन पवित्रेण शुद्धेन पूता अति पाप्मानमरातिं तरेम ॥ ५१॥

सजोषा इन्द्र सगणो मरुद्भिः सोमं पिब वृत्रहञ्छूर विद्वान् ।

जहि शत्रुरप मृधो नुदस्वाथाभयं कृणुहि विश्वतो नः ॥ ५२॥

सुमित्रा न आप ओषधयः सन्तु ।

दुर्मित्रास्तस्मै भूयासुर्योऽस्मान् द्वेष्टि यं च वयं द्विष्मः ॥ ५३॥

आपो हि ष्ठा मयोभुवस्ता न ऊर्जे दधातन । महे रणाय

चक्षसे । यो वः शिवतमो रसस्तस्य भाजयतेऽह नः ।

उशतीरिव मातरः । तस्मा अरं गमाम वो यस्य क्षयाय

जिन्वथ । आपो जनयथा च नः ॥ ५४॥

हिरण्यशङ्कं वरुणं प्रपद्ये तीर्थं मे देहि याचितः ।

यन्मया भुक्तमसाधूनां पापेभ्यश्च प्रतिग्रहः ॥ ५५॥

यन्मे मनसा वाचा कर्मणा वा दुष्कृतं कृतम् ।

तन्न इन्द्रो वरुणो बृहस्पतिः सविता च पुनन्तु पुनः पुनः ॥ ५६॥

नमोऽग्रयेऽप्सुमते नम इन्द्राय नमो वरुणाय नमो वारुण्यै

नमोऽद्भ्यः ॥ ५७॥

यदपां क्रूरं यदमेध्यं यदशान्तं तदपगच्छतात् ॥ ५८॥

अत्याशनादतीपानाद् यच्च उग्रात् प्रतिग्रहात् ।
 तन्मे वरुणो राजा पाणिना ह्यवमर्शतु ॥ ५९ ॥
 सोऽहमपापो विरजो निर्मुक्तो मुक्तकिल्बिषः ।
 नाकस्य पृष्ठमारुह्य गच्छेद्ब्रह्मसलोकताम् ॥ ६० ॥
 यश्चाप्सु वरुणः स पुनात्वघमर्षणः ॥ ६१ ॥
 इमं मे गङ्गे यमुने सरस्वति शुतुद्रि स्तोमं सचता परुष्ण्या ।
 असिक्रिअ मरुद्वधे वितस्तयार्जीकीये श्रुणुह्या सुषोमया ॥ ६२ ॥
 ऋतं च सत्यं चाभीद्धात्तपसोऽध्यजायत ।
 ततो रात्रिरजायत ततः समुद्रो अर्णवः ॥ ६३ ॥
 समुद्रादर्णवादधि संवत्सरो अजायत ।
 अहोरात्राणि विदधद्विश्वस्य मिषुतो वुशी ॥ ६४ ॥
 सूर्याचन्द्रमसौ धाता यथापूर्वमकल्पयत् ।
 दिवं च पृथिवीं चान्तरिक्षमथो सुवः ॥ ६५ ॥
 यत्पृथिव्यां रजः स्वमान्तरिक्षे विरोदसी ।
 इमां स्तदापो वरुणः पुनात्वघमर्षणः ॥
 पुनन्तु वसवः पुनातु वरुणः पुनात्वघमर्षणः ।
 एष भूतस्य मध्ये भुवनस्य गोप्ता ॥
 एष पुण्यकृतां लोकानेष मृत्योर्हिरण्मयम् ।
 द्यावापृथिव्योर्हिरण्मयं संश्रितं सुवः ।
 स नः सुवः संशिशधि ॥ ६६ ॥
 आर्द्रं ज्वलति ज्योतिरहमस्मि । ज्योतिर्ज्वलति ब्रह्माहमस्मि ।
 योऽहमस्मि ब्रह्माहमस्मि । अहमस्मि ब्रह्माहमस्मि । अहमेवाहं
 मां जुहोमि स्वाहा ॥ ६७ ॥
 अकार्यकार्यवकीर्णी स्तेनो भ्रूणहा गुरुतल्पगः ।
 वरुणोऽपामघमर्षणस्तस्मात् पापात् प्रमुच्यते ॥ ६८ ॥
 रजोभूमिस्त्व मां रोदयस्व प्रवदन्ति धीराः ॥ ६९ ॥

आक्रान्त्समुद्रः प्रथमे विधर्मञ्जनयन्त्रजा भुवनस्य राजा ।
वृषा पवित्रे अधि सानो अय्ये बृहत्सोमो वावृधे सुवान इन्दुः ॥ ७० ॥
द्वितीयोऽनुवाकः ।

जातवेदसे सुनवाम सोममरातीयतो निदहाति वेदः ।
स नः पर्षदति दुर्गाणि विश्वा नावेव सिन्धु दुरितात्यग्निः ॥ १ ॥

दुर्गा सूक्तम् ।

तामग्निवर्णां तपसा ज्वलन्तीं वैरोचनीं कर्मफलेषु जुष्टाम् ।
दुर्गा देवी शरणमहं प्रपद्ये सुतरसि तरसे नमः ॥ २ ॥
अग्ने त्वं पारया नव्यो अस्मान् स्वस्तिभिरति दुर्गाणि विश्वा ।
पूश्च पृथ्वी बहुला न उर्वी भवा तोकाय तनयाय शंयोः ॥ ३ ॥
विश्वानि नो दुर्गहा जातवेदः सिन्धुं न नावा दुरितातिपर्षि ।
अग्ने अत्रिवन्मनसा गृणानोऽस्माकं बोध्यविता तनूनाम् ॥ ४ ॥

पृतनाजितं सहमानमुग्रमग्निं हुवेम परमात्सधस्थात् ।
स नः पर्षदति दुर्गाणि विश्वा क्षामद्देवो अति दुरितात्यग्निः ॥ ५ ॥

प्रत्नोषि कमीड्यो अध्वरेषु सनाच्च होता नव्यश्च सत्सि ।
स्वां चाग्ने तनुवं पिप्रयस्वास्मभ्यं च सौभगमायजस्व ॥ ६ ॥

गोभिर्जुष्टमयुजो निषिक्तं तवेन्द्र विष्णोरनुसञ्चरेम ।
नाकस्य पृष्ठमभि संवसानो वैष्णवीं लोक इह मादयन्ताम् ॥ ७ ॥

तृतीयोऽनुवाकः ।

भूरन्नमग्रये पृथिव्यै स्वाहा भुवोऽन्न
वायवेऽन्तरिक्षाय स्वाहा सुवरन्नमादित्याय दिवे स्वाहा
भूर्भुवस्सुवरन्नं चन्द्रमसे दिग्भ्यः स्वाहा नमो देवेभ्यः
स्वधा पितृभ्यो भूर्भुवः सुवरन्नमोम् ॥ १ ॥

चतुर्थोऽनुवाकः ।

भूरग्रये पृथिव्यै स्वाहा भुवो वायवेऽन्तरिक्षाय स्वाहा

सुवरादित्याय दिवे स्वाहा भूर्भुवस्सुवश्चन्द्रमसे दिग्भ्यः
स्वाहा नमो देवेभ्यः स्वधा पितृभ्यो भूर्भुवः सुवरग्र ओम् ॥ १॥

पञ्चमोऽनुवाकः ।

भूरग्रये च पृथिव्यै च महते च स्वाहा, भुवो वायवे
चान्तरिक्षाय च महते च स्वाहा, सुवरादित्याय च दिवे च
महते च स्वाहा भूर्भुवस्सुवश्चन्द्रमसे च नक्षत्रेभ्यश्च
दिग्भ्यश्च महते च स्वाहा नमो देवेभ्यः स्वधा पितृभ्यो
भूर्भुवः सुवर्महरोम् ॥ १॥

षष्ठोऽनुवाकः ।

पाहि नो अग्र एनसे स्वाहा पाहि नो विश्ववेदसे स्वाहा,
यज्ञं पाहि विभावसो स्वाहा सर्वं पाहि शतक्रतो स्वाहा ॥ १॥

सप्तमोऽनुवाकः ।

पाहि नो अग्र एकया, पाह्युत द्वितीयया, पाह्युजै तृतीयया
पाहि गीर्भिश्चतसृभिर्वसो स्वाहा ॥ १॥

अष्टमोऽनुवाकः ।

यश्छन्दसामृषभो विश्वरूपश्छन्दोभ्यश्चन्दाँ स्याविवेश ।
सताँ शिक्यः प्रोवाचोपनिषदिन्द्री ज्येष्ठ इन्द्रियाय ऋषिभ्यो नमो
देवेभ्यः स्वधा पितृभ्यो भूर्भुवस्सुवश्छन्द ओम् ॥ १॥

नवमोऽनुवाकः ।

नमो ब्रह्मणे धारणं मे अस्त्वनिराकरणं धारयिता भूयासं
कर्णयोः श्रुतं मा च्योढं ममामुष्य ओम् ॥ १॥

दशमोऽनुवाकः ।

ऋतं तपः सत्यं तपः श्रुतं तपः शान्तं तपो दमस्तपः
शमस्तपो दानं तपो यज्ञं तपो भूर्भुवः सुवर्ब्रह्मैतदुपास्वैतत्तपः ॥ १॥

एकादशोऽनुवाकः ।

यथा वृक्षस्य सम्पुष्पितस्य दूराद्ग्रन्थो वात्येवं पुण्यस्य

कर्मणो दूराद्ग्रन्थो वाति यथासिधारां कर्तेऽवहितमवक्रामे
यद्युवे युवे हवा विह्वयिष्यामि कर्तं
पतिष्यामीत्येवममृतादात्मानं जुगुप्सेत् ॥ १॥

द्वादशोऽनुवाकः ।

अणोरणीयान् महतो महीयानात्मा गुहायां निहितोऽस्य जन्तोः ।
तमक्रतुं पश्यति वीतशोको धातुः प्रसादान्महिमानमीशम् ॥ १॥
सप्त प्राणा प्रभवन्ति तस्मात् सप्तार्चिषः समिधः सप्त जिह्वाः ।
सप्त इमे लोका येषु चरन्ति प्राणा गुहाशयान्निहिताः सप्त सप्त ॥ २॥
अतः समुद्रा गिरयश्च सर्वेऽस्मात्स्यन्दन्ते सिन्धवः सर्वरूपाः ।
अतश्च विश्वा ओषधयो रसाश्च येनेष भूतस्तिष्ठत्यन्तरात्मा ॥ ३॥
ब्रह्मा देवानां पदवीः कवीनामृषिर्विप्राणां महिषो मुगाणाम् ।
श्येनो गृध्राणां स्वधितिर्वनानां सोमः पवित्रमत्येति रेभन् ॥ ४॥
अजामेकां लोहितशुक्लकृष्णां बर्हीं प्रजां जनयन्तीं सरूपाम् ।
अजो ह्येको जुषमाणोऽनुशेते जहात्येनां भुक्तभोगामजोऽन्यः ॥ ५॥
हंसः शुचिषद्वसुरन्तरिक्षसद्धोता वेदिषदतिथिर्दुरोणसत् ।
नृषद्वरसदृतसद्योमसदजा गोजा ऋतजा अद्रिजा ऋतं बृहत् ॥ ६॥
यस्माञ्जाता न परा नैव किञ्चनास य आविवेश भुवनानि विश्वा ।
प्रजापतिः प्रजया संविदानस्त्रीणि ज्योतींषि सचते स षोडशी ॥ ६ क॥
विधर्तारं हवामहे वसोः कुविद्वनाति नः ।
सवितारं नृचक्षसम् ॥ ६ ख॥
घृतं मिमिक्षिरे घृतमस्य योनिर्घृते श्रितो घृतमुवस्य धाम ।
अनुष्वधमावह मादयस्व स्वाहाकृतं वृषभ वक्षि हव्यम् ॥ ७॥
समुद्रादूर्मिर्मधुमां उदारदुपां शुना सममृतत्वमानद् ।
घृतस्य नाम गुह्यं यदस्ति जिह्वा देवानाममृतस्य नाभिः ॥ ८॥
वयं नाम प्रब्रवामा घृतेनास्मिन् यज्ञे धारयामा नमोभिः ।
उप ब्रह्मा शृणवच्छस्यमानं चतुःशृङ्गोऽवमीद्वौर एतत् ॥ ९॥

चत्वारि शृङ्गा त्रयो अस्य पादा द्वेशीर्षे सप्त हस्तासो अस्य ।
 त्रिधा बद्धो वृषभो रोरवीति महो देवो मर्त्याँ आविवेश ॥ १०॥
 त्रिधा हितं पणिभिर्गुह्यमानं गवि देवासो घृतमन्वविन्दन् ।
 इन्द्र एकँ सूर्य एकं जजान वेनादेकँ स्वधया निष्टतक्षुः ॥ ११॥
 यो देवानां प्रथमं पुरस्ताद्विश्वाधिको रुद्रो महर्षिः ।
 हिरण्यगर्भं पश्यत जायमानँ स नो देवः
 शुभयास्मृत्या संयुनक्तु ॥ १२॥
 यस्मात्परं नापरमस्ति किञ्चित्
 यस्मान्नाणीयो न ज्यायौऽस्ति कश्चित् ।
 वृक्ष इव स्तब्धो दिवि तिष्ठत्येकस्तेनेदं पूर्णं पुरुषेण सर्वम् ॥ १३॥
 न कर्मणा न प्रजया धनेन त्यागेनैके अमृतत्वमानशुः ।
 परेण नाकं निहितं गुहायां बिभ्राजते यद्यतयो विशन्ति ॥ १४॥
 वेदान्तविज्ञानविनिश्चितार्थाः संन्यासयोगाद्यतयः शुद्धसत्त्वाः ।
 ते ब्रह्मलोके तु परान्तकाले परामृताः(त) परिमुच्यन्ति सर्वे ॥ १५॥
 दहं विपापं परमेऽश्मभूतं यत् पुण्डरीकं पुरमध्यसँ स्थम् । (वरवैऽश्मभूतं)
 तत्रापि दहे गगनं विशोकं तस्मिन् यदन्तस्तदुपासितव्यम् ॥ १६॥
 यो वेदादौ स्वरः प्रोक्तो वेदान्ते च प्रतिष्ठितः ।
 तस्य प्रकृतिलीनस्य यः परः स महेश्वरः ॥ १७॥
 त्रयोदशोऽनुवाकः ।
 सहस्रशीर्षं देवं विश्वाक्षं विश्वशम्भुवम् ।
 विश्वं नारायणं देवमक्षरं परमं प्रभुम् ॥ १॥
 विश्वतः परमं नित्यं विश्वं नारायणँ हरिम् ।
 विश्वमेवेदं पुरुषस्तद्विश्वमुपजीवति ॥ २॥
 पतिं विश्वस्यात्मेश्वरँ शाश्वतँ शिवमच्युतम् ।
 नारायणं महाज्ञेयं विश्वात्मानं परायणम् ॥ ३॥

नारायणः परं ब्रह्म तत्त्वं नारायणः परः ।
 नारायणः परो ज्योतिरात्मा नारायणः परः ॥ ४॥
 नारायणः परो ध्याता ध्यानं नारायणः परः ।
 यच्च किञ्चिज्जगत्यस्मिन् दृश्यते श्रूयतेऽपि वा ।
 अन्तर्बहिश्च तत्सर्वं व्याप्य नारायणः स्थितः ॥ ५॥
 अनन्तमव्ययं कविः समुद्रेऽन्तं विश्वशम्भुवम् ।
 पद्मकोशप्रतीकाशं हृदयं चाप्यधोमुखम् ॥ ६॥
 अधो निष्ठ्या वितस्त्यान्ते नाभ्यामुपरि तिष्ठति ।
 हृदयं तद्विजानीयाद्विश्वस्यायतनं महत् ॥ ७॥
 सन्ततं सिराभिस्तु लम्बत्याकोशसन्निभम् ।
 तस्यान्ते सुषिरं सूक्ष्मं तस्मिन्त्सर्वं प्रतिष्ठितम् ॥ ८॥
 तस्य मध्ये महानग्निर्विश्वार्चिर्विश्वतोमुखः ।
 सोऽग्रभुग्विभजन्तिष्ठन्नाहारमजरः कविः ॥ ९॥
 तिर्यगूर्ध्वमधःशायी रश्मयस्तस्य सन्तताः ।
 सन्तापयति स्वं देहमापादतलमस्तकम् ।
 तस्य मध्ये वह्निशिखा अणीयोर्ध्वा व्यवस्थिता ॥ १०॥
 नीलतोयदमध्यस्था विद्युल्लेखेव भास्वरा ।
 नीवारशूकवत्तन्वी पीता भास्वत्यणूपमा ॥ ११॥
 तस्याः शिखाया मध्ये परमात्मा व्यवस्थितः ।
 स ब्रह्म स शिवः स हरिः सेन्द्रः सोऽक्षरः परमः स्वराट् ॥ १२॥ (ब्रह्मा)
 चतुर्दशोऽनुवाकः ।
 आदित्यो वा एष एतन्मण्डलं तपति तत्र ता ऋचस्तद्वा मण्डलं
 स ऋचां लोकोऽथ य एष एतस्मिन्मण्डलेऽर्चिर्दीप्यते तानि सामानि स
 साम्नां लोकोऽथ य एष एतस्मिन्मण्डलेऽर्चिषि पुरुषस्तानि
 यजूंषि स यजुषा मण्डलं स यजुषां लोकः सैषा त्रय्येव
 विद्या तपति य एषोऽन्तरादित्ये हिरण्मयः पुरुषः ॥ १॥

पञ्चदशोऽनुवाकः ।

आदित्यो वै तेज ओजो बलं यशश्चक्षुः श्रोत्रमात्मा मनो मन्युर्मनुर्मृत्युः
सत्यो मित्रो वायुराकाशः प्राणो लोकपालः कः किं कं तत्सत्यमन्नममृतो
जीवो विश्वः कतमः स्वयम्भु ब्रह्मैतदमृत एष पुरुष एष
भूतानामधिपतिर्ब्रह्मणः सायुज्यं सलोकतामाप्नोत्येतासामेव
देवतानां सायुज्यं साष्टितां समानलोकतामाप्नोति य एवं
वेदेत्युपनिषत् ॥ १॥

घृणिः सूर्य आदित्योमर्चयन्ति तपः सत्यं मधु क्षरन्ति तद्ब्रह्म तदाप
आपो ज्योती रसोऽमृतं ब्रह्म भूर्भुवः सुवरोम् ॥ २॥

षोडशोऽनुवाकः ।

निधनपतये नमः । निधनपतान्तिकाय नमः ।
ऊर्ध्वाय नमः । ऊर्ध्वलिङ्गाय नमः ।
हिरण्याय नमः । हिरण्यलिङ्गाय नमः ।
सुवर्णाय नमः । सुवर्णलिङ्गाय नमः ।
दिव्याय नमः । दिव्यलिङ्गाय नमः ।
भवाय नमः । भवलिङ्गाय नमः ।
शर्वाय नमः । शर्वलिङ्गाय नमः ।
शिवाय नमः । शिवलिङ्गाय नमः ।
ज्वलाय नमः । ज्वललिङ्गाय नमः ।
आत्माय नमः । आत्मलिङ्गाय नमः ।
परमाय नमः । परमलिङ्गाय नमः ।
एतत्सोमस्य सूर्यस्य सर्वलिङ्गं
स्थापयति पाणिमन्त्रं पवित्रम् ॥ १॥

सप्तदशोऽनुवाकः ।

सद्योजातं प्रपद्यामि सद्योजाताय वै नमो नमः ।
भवे भवे नातिभवे भवस्व माम् । भवोद्भवाय नमः ॥ १॥

अष्टादशोऽनुवाकः ।

वामदेवाय नमो ज्येष्ठाय नमः श्रेष्ठाय नमो रुद्राय

नमः॑ कालाय॑ नमः॑ कल॑विकरणाय॑ नमो॑ बल॑विकरणाय॑ नमो॑
बलाय॑ नमो॑ बल॑प्रमथनाय॑ नमः॑ सर्व॑भूतदमनाय॑ नमो॑
मनो॑न्मनाय॑ नमः॑ ॥ १॥

एकोनविंशोऽनुवाकः ।

अ॒घोरे॑भ्योऽथ॑ घो॒रेभ्यो॑ घो॒रघो॑रतरेभ्यः ।
सर्व॑तः॑ शर्व॑ सर्व॑भ्यो॑ नम॑स्ते अस्तु॑ रु॒द्ररू॑पेभ्यः ॥ १॥

विंशोऽनुवाकः ।

तत्पुरु॑षाय॑ वि॒द्महे॑ महा॒देवाय॑ धीमहि । तन्नो॑ रु॒द्रः प्रचो॑दयात् ॥ १॥
एकविंशोऽनुवाकः ।

ईशानः॑ सर्व॑विद्यानामीश्वरः॑ सर्व॑भूतानां॑
ब्रह्माधि॑पतिर्ब्रह्म॑णोऽधि॑पतिर्ब्रह्मा॑ शिवो॑ मे॑ अस्तु॑ सदा॑शिवोम् ॥ १॥
द्वाविंशोऽनुवाकः ।

नमो॑ हिरण्यबाहवे॑ हिरण्यवर्णाय॑ हिरण्यरूपाय॑ हिरण्यपतये ।
अम्बिका॑पतये॑ उमा॑पतये॑ पशु॑पतये॑ नमो॑ नमः॑ ॥ १॥

त्रयोविंशोऽनुवाकः ।

ऋत॑ꣳ सत्यं॑ परं॑ ब्रह्म॑ पुरुषं॑ कृष्ण॑पिङ्गलम् ।
ऊर्ध्व॑रेतं॑ वि॒रूपाक्षं॑ वि॒श्वरू॑पाय॑ वै नमो॑ नमः॑ ॥ १॥

चतुर्विंशोऽनुवाकः ।

सर्वो॑ वै रु॒द्रस्तस्मै॑ रु॒द्राय॑ नमो॑ अस्तु॑ । पुरु॑षो वै रु॒द्रः
सन्म॑हो नमो॑ नमः॑ ।
विश्वं॑ भूतं॑ भुवनं॑ चि॒त्रं बहु॑धा जा॒तं जाय॑मानं च॒ यत् ।
सर्वो॑ ह्येष॑ रु॒द्रस्तस्मै॑ रु॒द्राय॑ नमो॑ अस्तु॑ ॥ १॥

पञ्चविंशोऽनुवाकः ।

कद्रु॑द्राय॑ प्रचेतसे॑ मी॒दुष्ट॑माय॑ तव्यसे॑ । वो॒चेम॑ शन्तम॑ꣳ हृ॒दे ।
सर्वो॑ ह्येष॑ रु॒द्रस्तस्मै॑ रु॒द्राय॑ नमो॑ अस्तु॑ ॥ १॥

षड्विंशोऽनुवाकः ।

यस्य वैकङ्कत्यग्निहोत्रहवणी भवति प्रत्येवास्याहुतयस्तिष्ठत्यथो
प्रतिष्ठित्यै ॥ १॥

सप्तविंशोऽनुवाकः ।

कृणुष्व पाज इति पञ्च ।

कृणुष्व पाजः प्रसितिं न पृथ्वीं याहि राजेवामवाँ इभेन ।
तृष्णीमनु प्रसितिं द्रूणानोऽस्तासि विध्य रक्षसस्तपिष्ठैः ॥ १॥

तव भ्रमास आशुया पतन्त्यनु स्पृश धृषता शोशुचानः ।
तपूष्यग्रे जुह्वा पतङ्गानसन्दितो वि सृज विश्वगुल्काः ॥ २॥

प्रति स्पशो विसृज तूणितमो भवा पायुर्विशो अस्या अदब्धः ।
यो नो दूरे अघश सो यो अन्त्यग्रे माकिष्टे व्यथिरादधर्षीत् ॥ ३॥

उदग्रे तिष्ठ प्रत्या तनुष्व न्यमित्राँ ओषतात्तिग्महेते ।

यो नो अरातिं समिधान चक्रे नीचातं धक्ष्यतसं न शुष्कम् ॥ ४॥

ऊर्ध्वो भव प्रति विद्याध्यस्मदाविष्कृणुष्व दैव्यान्यग्रे ।

अवस्थिरा तनुहि यातुजूनां जामिमजामिं प्रमृणीहि शत्रून् ॥ ५॥

अष्टाविंशोऽनुवाकः ।

अदितिर्देवा गन्धर्वा मनुष्याः पितरोऽसुरास्तेषाँ

सर्वभूतानां माता मेदिनी महती मही सावित्री गायत्री

जगत्युर्वी पृथ्वी बहुला विश्वा भूता कतमा काया सा

सत्येत्यमृतेति वासिष्ठः ॥ १॥

एकोनत्रिंशोऽनुवाकः ।

आपो वा इदँ सर्वं विश्वा भूतान्यापः प्राणा वा आपः

पशव आपोऽन्नमापोऽमृतमापः सम्राडापो विराडापः

स्वराडापश्छन्दाँ स्यापो ज्योतीँ ष्यापो यजूँ ष्यापः

सत्यमापः सर्वा देवता आपो भूर्भुवः सुवराप ओम् ॥ १॥

त्रिंशोऽनुवाकः ।

आपः पुनन्तु पृथिवीं पृथिवी पूता पुनातु माम् ।
 पुनन्तु ब्रह्मणस्पतिर्ब्रह्मपूता पुनातु माम् ॥ १॥
 यदुच्छिष्टमभोज्यं यद्वा दुश्चरितं मम ।
 सर्वं पुनन्तु मामापोऽसतां च प्रतिग्रहं स्वाहा ॥ २॥

एकत्रिंशोऽनुवाकः ।

अग्निश्च मा मन्युश्च मन्युपतयश्च मन्युकृतेभ्यः ।
 पापेभ्यो रक्षन्ताम् । यदह्वा पापमकार्षम् ।
 मनसा वाचा हस्ताभ्याम् । पञ्चामुदरेण शिश्रा ।
 अहस्तदवलुम्पतु । यत्किञ्च दुरितं मयि । इदमहं
 माममृतयो नौ । सत्ये ज्योतिषि जुहोमि स्वाहा ॥ १॥

द्वात्रिंशोऽनुवाकः ।

सूर्यश्च मा मन्युश्च मन्युपतयश्च मन्युकृतेभ्यः ।
 पापेभ्यो रक्षन्ताम् । यद्वात्रिया पापमकार्षम् ।
 मनसा वाचा हस्ताभ्याम् । पञ्चामुदरेण शिश्रा । रात्रिस्तदवलुम्पतु ।
 यत्किञ्च दुरितं मयि । इदमहं माममृतयो नौ । सूर्ये
 ज्योतिषि जुहोमि स्वाहा ॥ १॥

त्रयस्त्रिंशोऽनुवाकः ।

ओमित्येकाक्षरं ब्रह्म । अग्निर्देवता ब्रह्म इत्यार्षम् ।
 गायत्रं छन्दं परमात्मं सरूपम् । सायुज्यं विनियोगम् ॥ १॥

चतुस्त्रिंशोऽनुवाकः ।

आयातु वरदा देवी अक्षरं ब्रह्म संमितम् ।
 गायत्री छन्दसां मातेदं ब्रह्म जुषस्व नः ॥ १॥ (गायत्रई)
 यदह्वात्कुरुते पापं तदह्वात्प्रतिमुच्यते ।
 यद्वात्रियात्कुरुते पापं तद्वात्रियात्प्रतिमुच्यते ।
 सर्ववर्णे महादेवि सन्ध्याविद्ये सरस्वति ॥ २॥

पञ्चत्रिंशोऽनुवाकः ।

ओजोऽसि सहोऽसि बलमसि भ्राजोऽसि देवानां धामनामासि विश्वमासि
 विश्वायुः सर्वमसि सर्वायुरभिभूरो गायत्रीमावाहयामि
 सावित्रीमावाहयामि सरस्वतीमावाहयामि छन्दर्हीनावाहयामि
 श्रियमावाहयामि गायत्रिया गायत्री छन्दो विश्वामित्र ऋषिः
 सविता देवताग्निर्मुखं ब्रह्मा शिरो विष्णुहृदयं रुद्रः शिखा
 पृथिवी योनिः प्राणापानव्यानोदानस्माना सप्राणा श्वेतवर्णा
 साङ्ख्यायनसगोत्रा गायत्री चतुर्विंशत्यक्षरा त्रिपदा ङ्कुक्षिः
 पञ्चशीर्षोपनयने विनियोगः ॥ १॥

ॐ भूः । ॐ भुवः । ओं सुवः । ॐ महः । ॐ जनः । ॐ तपः ।
 ओं सत्यम् । ॐ तत्सवितुर्वरेण्यं भर्गो देवस्य धीमहि ।
 धियो यो नः प्रचोदयात् । ओमापो ज्योती रसोऽमृतं ब्रह्म
 भूर्भुवः सुवरोम् ॥ २॥

षट्त्रिंशोऽनुवाकः ।

उत्तमे शिखरे देवि जाते भूम्यां पर्वतमूर्धनि ।
 ब्राह्मणेभ्योऽभ्यनुज्ञाता गच्छ देवि यथासुखम् ॥ १॥

स्तुतो मया वरदा वेदमाता
 प्रचोदयन्तां पवने द्विजाता ।
 आयुः प्राणं प्रजां पशुं कीर्तिं द्रविणं
 ब्रह्मवर्चसं मह्यं दत्त्वा व्रजत ब्रह्मलोकम् ॥ २॥

सप्तत्रिंशोऽनुवाकः ।

घृणिः सूर्य आदित्यो न प्रभा वात्यक्षरम् । मधु क्षरन्ति तद्रसम् ।
 सत्यं वै तद्रसमापो ज्योती रसोऽमृतं ब्रह्म भूर्भुवः सुवरोम् ॥ १॥

त्रिसुपर्णमन्त्रः ?

अष्टत्रिंशोऽनुवाकः ।

ब्रह्ममेतु माम् । मधुमेतु माम् । ब्रह्ममेव मधुमेतु माम् ।
 यास्ते सोम प्रजा वत्सोऽभि सो अहम् । दुःष्वप्रहन् दुरुष्वह ।
 यास्ते सोम प्राणां स्ताञ्जुहोमि ॥ १॥

त्रिसुपर्णमयाचितं ब्राह्मणाय दद्यात् । ब्रह्महृत्यां वा एते घ्नन्ति ।

ये ब्राह्मणास्त्रिसुपर्णं पठन्ति । ते सोमं प्राप्नुवन्ति । आ

सहस्रात् पङ्क्तिं पुनन्ति । ॐ ॥ २॥

त्रिसुपर्णमन्त्रः २

एकोनचत्वारिंशोऽनुवाकः ।

ब्रह्म मेधया । मधु मेधया । ब्रह्ममेव मधु मेधया ॥ १॥

अद्यानो देव सवितः प्रजावत्सावीः सौभगम् ।

परा दुःष्वप्रियं सुव ॥ २॥

विश्वानि देव सवितर्दुरितानि परासुव । यद्भद्रं तन्म आसुव ॥ ३॥

मधुवाता ऋतायते मधुक्षरन्ति सिन्धवः । माध्वीर्नः सन्त्वोषधीः ॥ ४॥

मधु नक्तमुतोषसि मधुमत्पार्थिवं रजः । मधुद्यौरस्तु नः पिता ॥ ५॥

मधुमात्रो वनस्पतिर्मधुमा अस्तु सूर्यः । माध्वीर्गावो भवन्तु नः ॥ ६॥

य इमं त्रिसुपर्णमयाचितं ब्राह्मणाय दद्यात् ।

भ्रूणहृत्यां वा एते घ्नन्ति ।

ये ब्राह्मणास्त्रिसुपर्णं पठन्ति । ते सोमं प्राप्नुवन्ति ।

आसहस्रात्पङ्क्तिं पुनन्ति । ॐ ॥ ७॥

त्रिसुपर्णमन्त्रः ३

चत्वारिंशोऽनुवाकः ।

ब्रह्म मेधवा । मधु मेधवा । ब्रह्ममेव मधु मेधवा ॥ १॥

ब्रह्मा देवानां पदवीः कवीनामृषिर्विप्राणां महिषो मृगाणाम् ।

श्येनो गृद्धाणां स्वधितिर्वनानां सोमः पवित्रमत्येति रेभन् ॥ २॥

हंसः शुचिषद्वसुरन्तरिक्षसद्धोता वेदिषदतिथिर्दुरोणसत् ।

नृषद्वरसदतसद्व्योमसदजा गोजा ऋतजा अद्रिजा ऋतं बृहत् ॥ ३॥

ऋचे त्वा ऋचे त्वा समित्स्त्रवन्ति सरितो न धेनाः ।

अन्तर्हृदा मनसा पूयमानाः । घृतस्य धारा अभिचाकशीमि ॥ ४॥

हिरण्ययो वेतसो मध्य आसाम् । तस्मिन्सुपर्णो मधुकृत् कुलायी भजन्नास्ते
मधु देवताभ्यः । तस्यासते हरयः सप्त तीरे स्वधां
दुहाना अमृतस्य धाराम् ॥ ५॥

य इदं त्रिसुपर्णमयाचितं ब्राह्मणाय दद्यात् ।
वीरहृत्यां वा एते घ्नन्ति ।
ये ब्राह्मणास्त्रिसुपर्णं पठन्ति । ते सोमं प्राप्नुवन्ति ।
आसहस्रात् पङ्क्तिं पुनन्ति । ॐ ॥ ६॥

एकचत्वारिंशोऽनुवाकः ।

मेधादेवी जुषमाणा न आगाद्विश्वाची भद्रा सुमनस्यमाना ।
त्वया जुष्टा जुषमाणा दुरुक्तान्बृहद्वदेम विदथे सुवीराः ॥ १॥
त्वया जुष्ट ऋषिर्भवति देवि त्वया ब्रह्मागतश्रीरुत त्वया ।
त्वया जुष्टश्चित्रं विन्दते वसु सा नो जुषस्व द्रविणेन मेधे ॥ २॥

द्विचत्वारिंशोऽनुवाकः ।

मेधां म इन्द्रो ददातु मेधां देवी सरस्वती ।
मेधां मे अश्विनावुभावाधत्तां पुष्करस्रजौ ॥ १॥
अप्सरासु च या मेधा गन्धर्वेषु च यन्मनः ।
दैवी मेधा सरस्वती स मां मेधा सुरभिर्जुषतां स्वाहा ॥ २॥

त्रिचत्वारिंशोऽनुवाकः ।

आ मां मेधा सुरभिर्विश्वरूपा हिरण्यवर्णा जगती जगम्या ।
ऊर्जस्वती पयसा पिन्वमाना सा मां मेधा सुप्रतीका जुषताम् ॥ १॥

चतुश्चत्वारिंशोऽनुवाकः ।

मयि मेधां मयि प्रजां मय्यग्निस्तेजो दधातु ।
मयि मेधां मयि प्रजां मयीन्द्र इन्द्रियं दधातु ।
मयि मेधां मयि प्रजां मयि सूर्यो भ्राजो दधातु ॥ १॥

पञ्चचत्वारिंशोऽनुवाकः ।

अपैतु मृत्युरमृतं न आगन्वैवस्वतो नो अभयं कृणोतु ।

पर्णं वनस्पतेरिवाभि नः शीयतां रयिः सचतां नः शचीपतिः ॥ १॥

षट्त्वारिंशोऽनुवाकः ।

परं मृत्यो अनुपरेहि पन्थां यस्ते स्व इतरो देवयानात् ।

चक्षुष्मते शृण्वते ते ब्रवीमि मा नः प्रजा रीरिषो मोत वीरान् ॥ १॥

सप्तचत्वारिंशोऽनुवाकः ।

वातं प्राणं मनसान्वारभामहे प्रजापतिं यो भुवनस्य गोपाः ।

स नो मृत्योस्त्रायतां पात्व हंसो ज्योग्जीवा जरामशीमहि ॥ १॥

अष्टचत्वारिंशोऽनुवाकः ।

अमुत्रभूयादध यद्यमस्य बृहस्पते अभिशस्तेरमुञ्चः ।

प्रत्यौहतामश्विना मृत्युमस्मद्देवानामग्ने भिषजा शचीभिः ॥ १॥

एकोनपञ्चाशोऽनुवाकः ।

हरिं हरन्तमनुयन्ति देवा विश्वस्येशानं वृषभं मतीनाम् ।

ब्रह्मसरूपमनु मेदमागादयनं मा विवधीर्विक्रमस्व ॥ १॥

पञ्चाशोऽनुवाकः ।

शल्कैरग्निमिन्धान उभौ लोकौ सनेमहम् ।

उभयोर्लोकयोर्ऋध्वाति मृत्युं त्राम्यहम् ॥ १॥

एकपञ्चाशोऽनुवाकः ।

मा छिदो मृत्यो मा वधीर्मा मे बलं विवृहो मा प्रमोषीः ।

प्रजां मा मे रीरिष आयुरुग्र नृचक्षसं त्वा हविषा विधेम ॥ १॥

द्विपञ्चाशोऽनुवाकः ।

मा नो महान्तमुत मा नो अर्भकं

मा न उक्षन्तमुत मा न उक्षितम् ।

मा नो वधीः पितरं मोत मातरं प्रिया मा नस्तनुवो रुद्र रीरिषः ॥ १॥

त्रिपञ्चाशोऽनुवाकः ।

मा नस्तोके तनये मा न आयुषि

मा नो गोषु मा नो अश्वेषु रीरिषः ।

वीरान्मा नो रुद्र भामितो वधी-

र्हविष्मन्तो नमसा विधेम ते ॥ १॥

चतुष्पञ्चाशोऽनुवाकः ।

प्रजापते न त्वदेतान्यन्यो विश्वा जातानि परि ता बभूव ।

यत्कामस्ते जुहुमस्तन्नो अस्तु वयं स्याम पतयो रयीणाम् ॥ १॥

पञ्चपञ्चाशोऽनुवाकः ।

स्वस्तिदा विशस्पतिर्वृत्रहा विमृधो वशी ।

वृषेन्द्रः पुर एतु नः स्वस्तिदा अभयङ्करः ॥ १॥

षट्पञ्चाशोऽनुवाकः ।

त्र्यम्बकं यजामहे सुगन्धिं पुष्टिवर्धनम् ।

उर्वारुकमिव बन्धनान्मृत्योर्मुक्षीय मामृतात् ॥ १॥

सप्तपञ्चाशोऽनुवाकः ।

ये ते सहस्रमयुतं पाशा मृत्यो मर्त्याय हन्तवे ।

तान् यज्ञस्य मायया सर्वानवयजामहे ॥ १॥

अष्टपञ्चाशोऽनुवाकः ।

मृत्यवे स्वाहा मृत्यवे स्वाहा ॥ १॥

एकोनषष्टितमोऽनुवाकः ।

देवकृतस्यैनसोऽवयजनमसि स्वाहा ।

मनुष्यकृतस्यैनसोऽवयजनमसि स्वाहा ।

पितृकृतस्यैनसोऽवयजनमसि स्वाहा ।

आत्मकृतस्यैनसोऽवयजनमसि स्वाहा ।

अन्यकृतस्यैनसोऽवयजनमसि स्वाहा ।

अस्मत्कृतस्यैनसोऽवयजनमसि स्वाहा ।

यद्दिवा च नक्तं चैनश्चकृम तस्यावयजनमसि स्वाहा ।

यत्स्वपन्तश्च जाग्रतश्चैनश्चकृम तस्यावयजनमसि स्वाहा ।

यत्सु॑पु॒प्तश्च॑ जा॒ग्रत॑श्चैन॒श्चकृ॑म तस्या॑वय॒जनम॑सि॒ स्वाहा॑ ।
यद्वि॒द्वाँ स॑श्चावि॒द्वाँ स॑श्चैन॒श्चकृ॑म तस्या॑वय॒जनम॑सि॒ स्वाहा॑ ।
ए॒नस॑ ए॒नसोऽव॑य॒जनम॑सि॒ स्वाहा॑ ॥ १॥

षष्टितमोऽनुवाकः ।

यद्वो॑ दे॒वाश्च॑कृ॒म जि॒ह्वायां॑ गुरु॑
म॒नसो॑ वा प्र॒युती॑ दे॒वहे॑डनम् ।
अ॒रावा॑ यो नो अ॒भि दु॑च्छु॒नाय॑ते
तस्मि॑न् तदे॒नो वस॑वो नि॒धेत॑न् स्वाहा॑ ॥ १॥

एकषष्टितमोऽनुवाकः ।

का॒मोऽका॑र्षी॒न्नमो॑ नमः । का॒मोऽका॑र्शी॒त्कामः॑ करोति नाहं करोमि कामः कर्ता
नाहं कर्ता कामः का॒रयि॑ता नाहं का॒रयि॑ता एष ते काम का॒माय॑ स्वाहा ॥ १॥

द्विषष्टितमोऽनुवाकः ।

म॒न्युरका॑र्षी॒न्नमो॑ नमः । म॒न्युरका॑र्षी॒न्मन्युः॑ करोति नाहं
करोमि मन्युः कर्ता नाहं कर्ता
म॒न्युः का॒रयि॑ता नाहं का॒रयि॑ता एष ते मन्यो मन्य॑वे स्वाहा ॥ १॥

त्रिषष्टितमोऽनुवाकः ।

ति॒लाञ्जु॑होमि सर॒सान् स॑पि॒ष्ठान् ग॑न्धार मम चित्ते रमन्तु स्वाहा ॥ १॥
गा॒वो हि॑रण्यं धनम॒न्नपान॑ँ स॒र्वेषा॑ँ श्रि॒चै स्वाहा॑ ॥ २॥

श्रि॒यं च ल॑क्ष्मीं च पु॒ष्टिं च की॑र्तिं चानृ॒ण्यता॑म् ।
ब्रा॒ह्मण्यं॑ बहु॒पुत्र॑ताम् । श्रद्धा॑मे॒धे प्र॑जाः स॒न्ददा॑तु स्वाहा ॥ ३॥

चतुःषष्टितमोऽनुवाकः ।

ति॒लाः कृ॑ष्णा॒स्तिलाः॑ श्वे॒तास्तिलाः॑ सौ॒म्या व॑शानु॒गाः ।
ति॒लाः पु॑नन्तु मे पा॒पं य॑त्किञ्चिद् दुरि॒तं म॑यि स्वाहा ॥ १॥
चो॒रस्या॑न्नं नवश्राद्धं ब्रह्महा गुरु॒तल्प॑गः ।
गो॒स्तेय॑ँ सु॒रापा॑नं भ्रूणहत्या तिला शान्तिँ शमयन्तु स्वाहा ॥ २॥
श्रीश्च लक्ष्मीश्च पुष्टीश्च कीर्तिं चानृण्यताम् ।

ब्रह्मण्यं बहुपुत्रताम् । श्रद्धामेधे प्रज्ञा तु जातवेदः

सन्ददातु स्वाहा ॥ ३॥

पञ्चषष्टितमोऽनुवाकः ।

प्राणापानव्यानोदानसमाना मे शुध्यन्तां

ज्योतिरहं विरजा विपाप्मा भूयासु स्वाहा ॥ १॥

वाङ्मनश्चक्षुःश्रोत्रजिह्वाघ्राणरेतोबुद्ध्याकृतिःसङ्कल्पा मे

शुध्यन्तां ज्योतिरहं विरजा विपाप्मा भूयासु स्वाहा ॥ २॥

त्वक्कर्ममांसरुधिरमेदोमज्जास्नायवोऽस्थीनि मे शुध्यन्तां

ज्योतिरहं विरजा विपाप्मा भूयासु स्वाहा ॥ ३॥

शिरःपाणिपादपार्श्वपृष्ठोरूधरजङ्घाशिश्रोपस्थपायवो मे

शुध्यन्तां ज्योतिरहं विरजा विपाप्मा भूयासु स्वाहा ॥ ४॥

उत्तिष्ठ पुरुष हरित पिङ्गल लोहिताक्षि देहि देहि

ददापयिता मे शुध्यन्तां ज्योतिरहं विरजा

विपाप्मा भूयासु स्वाहा ॥ ५॥

षट्षष्टितमोऽनुवाकः ।

पृथिव्यसेजोवायुराकाशा मे शुध्यन्तां

ज्योतिरहं विरजा विपाप्मा भूयासु स्वाहा ॥ १॥

शब्दस्पर्शरूपरसगन्धा मे शुध्यन्तां

ज्योतिरहं विरजा विपाप्मा भूयासु स्वाहा ॥ २॥

मनोवाक्कायकर्माणि मे शुध्यन्तां

ज्योतिरहं विरजा विपाप्मा भूयासु स्वाहा ॥ ३॥

अव्यक्तभावैरहङ्कारैर् -

ज्योतिरहं विरजा विपाप्मा भूयासु स्वाहा ॥ ४॥

आत्मा मे शुध्यन्तां

ज्योतिरहं विरजा विपाप्मा भूयासु स्वाहा ॥ ५॥

अन्तरात्मा मे शुध्यन्तां

ज्योति॑र॒हं वि॒रजा॑ वि॒पाप्मा॑ भूया॒स॒ स्वाहा॑ ॥ ६॥

परमात्मा मे शुध्यन्तां

ज्योति॑र॒हं वि॒रजा॑ वि॒पाप्मा॑ भूया॒स॒ स्वाहा॑ ॥ ७॥

क्षु॒धे स्वाहा॑ । क्षु॒त्पि॑पासाय॒ स्वाहा॑ । वि॒वि॒ट्यै स्वाहा॑ ।

ऋ॒ग्वि॒धाना॑य॒ स्वाहा॑ । क॒षौ॒त्का॑य॒ स्वाहा॑ । ॐ स्वाहा॑ ॥ ८॥

क्षु॒त्पि॑पा॒साम॑लं ज्येष्ठामललक्ष्मीर्नाशयाम्यहम् ।

अभू॑तिमसमृद्धिं च सर्वा॑न्निर्णुद मे पाप्मानं॑ स्वाहा ॥ ९॥

अन्नमयप्राणमयमनोमयविज्ञानमयमानन्दमयमात्मा मे
शुध्यन्तां ज्योति॑र॒हं वि॒रजा॑ वि॒पाप्मा॑ भूया॒स॒ स्वाहा॑ ॥ १०॥

सप्तषष्टितमोऽनुवाकः ।

अ॒ग्रये॑ स्वाहा॑ । वि॒श्वेभ्यो॑ दे॒वेभ्य॑ स्वाहा॑ । ध्रु॒वाय॑ भू॒माय॑
स्वाहा॑ । ध्रु॒व॒क्षि॑तये स्वाहा॑ ।

अ॒च्यु॒त॒क्षि॑तये स्वाहा॑ । अ॒ग्रये॑ स्वि॒ष्ट॒कृ॒ते स्वाहा॑ ॥

ध॒र्माय॑ स्वाहा॑ । अध॒र्माय॑ स्वाहा॑ । अ॒द्भ्यः स्वाहा॑ ।

ओ॒ष॒धि॒व॒न॒स्प॒ति॒भ्यः स्वाहा॑ । र॒क्षो॒दे॒व॒ज॒ने॒भ्यः स्वाहा॑ ।

गृ॒ह्या॒भ्यः स्वाहा॑ । अ॒व॒सा॒ने॒भ्यः स्वाहा॑ । अ॒व॒सा॒न॒प॒ति॒भ्यः
स्वाहा॑ । स॒र्व॒भू॒ते॒भ्यः स्वाहा॑ । का॒माय॑ स्वाहा॑ । अ॒न्त॒रि॒क्षाय॑

स्वाहा॑ । य॒दे॒ज॒ति॑ ज॒ग॒ति॑ य॒च्च॑ चेष्टति॒ नाम्नो॑ भा॒गोऽयं

ना॒म्ने स्वाहा॑ । पृथि॒व्यै स्वाहा॑ । अ॒न्त॒रि॒क्षाय॑ स्वाहा॑ । दि॒वे

स्वाहा॑ । सू॒र्याय॑ स्वाहा॑ । च॒न्द्र॒म॒से स्वाहा॑ । न॒क्ष॒त्रे॒भ्यः

स्वाहा॑ । इ॒न्द्राय॑ स्वाहा॑ । बृ॒ह॒स्प॒तये॑ स्वाहा॑ । प्र॒जा॒प॒तये॑

स्वाहा॑ । ब्र॒ह्म॒णे स्वाहा॑ । स्व॒धा पि॑तृभ्यः स्वाहा॑ । नमो॑

रु॒द्राय॑ पशुपतये स्वाहा॑ । दे॒वेभ्यः॑ स्वाहा॑ । पि॑तृभ्यः

स्व॒धास्तु॑ । भू॒तेभ्यो॑ नमः । म॒नु॒ष्ये॒भ्यो ह॑न्ता । प्र॒जा॒प॒तये॑

स्वाहा॑ । परमेष्ठि॑ने स्वाहा॑ ॥ १॥

यथा कूपः शतधारः सहस्रधारो अक्षितः ।

ए॒वा मे॑ अस्तु॒ धान्यं॑ सहस्र॑धारम॒क्षितम् ॥ धन॑धान्यै॒ स्वाहा ॥ २॥

ये भू॒ताः प्र॒चर॑न्ति॒ दिवा॑नक्तं
बलि॑मिच्छन्तो॒ वितु॑दस्य॒ प्रेष्याः॑ ।

तेभ्यो॑ बलिं॒ पुष्टि॑कामो॒ हरामि॑
मयि॑ पुष्टिं॒ पुष्टि॑पतिर्दधातु॒ स्वाहा ॥ ३॥

अष्टषष्टितमोऽनुवाकः ।

ॐ तद्ब्र॒ह्म । ॐ तद्वा॒युः । ॐ तदा॒त्मा । ॐ तत्स॒त्यम् ।
ॐ तत्सर्व॑म् । ॐ तत्पु॒रोर्नमः॑ ॥ १॥

ॐ अन्तश्चरति॑ भूतेषु॒ गुहा॑यां विश्व॑मूर्तिषु ।
त्वं यज्ञ॑स्त्वं वषट्कार॑स्त्वमिन्द्र॑स्त्व रुद्र॑स्त्वं विष्णु॑स्त्वं
ब्रह्म॑ त्वं प्रजा॑पतिः । त्वं तदा॑प॒ आपो॑ ज्योती॒ रसो॑ऽमृतं
ब्रह्म॑ भूर्भुवः॒ सुव॑रोम् ॥ २॥

एकोनसप्ततितमोऽनुवाकः ।

श्रद्धा॑यां प्रा॒णे नि॒विष्टो॑ऽमृतं॒ जुहो॑मि ।
श्रद्धा॑याम॒पाने॑ नि॒विष्टो॑ऽमृतं॒ जुहो॑मि ।
श्रद्धा॑यां व्या॒ने नि॒विष्टो॑ऽमृतं॒ जुहो॑मि ।
श्रद्धा॑यामु॒दाने॑ नि॒विष्टो॑ऽमृतं॒ जुहो॑मि ।
श्रद्धा॑यां॑ स॒माने॑ नि॒विष्टो॑ऽमृतं॒ जुहो॑मि ।
ब्रह्म॑णि म आ॒त्मा॒मृत॑त्वाय ॥ १॥

अमृतोपस्तरणमसि ॥ २॥

श्रद्धा॑यां प्रा॒णे नि॒विष्टो॑ऽमृतं॒ जुहो॑मि ।
शि॒वो मा॑ वि॒शाप्र॑दाहाय । प्रा॒णाय॑ स्वाहा ॥
श्रद्धा॑याम॒पाने॑ नि॒विष्टो॑ऽमृतं॒ जुहो॑मि ।
शि॒वो मा॑ वि॒शाप्र॑दाहाय । अ॒पानाय॑ स्वाहा ॥
श्रद्धा॑यां व्या॒ने नि॒विष्टो॑ऽमृतं॒ जुहो॑मि ।
शि॒वो मा॑ वि॒शाप्र॑दाहाय । व्या॒नाय॑ स्वाहा ॥

श्रद्धायामुदाने निविष्टोऽमृतं जुहोमि ।

शिवो मा विशाप्रदाहाय । उदानाय स्वाहा ॥

श्रद्धायाम् समाने निविष्टोऽमृतं जुहोमि ।

शिवो मा विशाप्रदाहाय । समानाय स्वाहा ॥

ब्रह्मणि म आत्मामृतत्वाय ॥ ३॥

अमृतापिधानमसि ॥ ४॥

एकसप्ततितमोऽनुवाकः ।

अङ्गुष्ठमात्रः पुरुषोऽङ्गुष्ठं च समाश्रितः ।

ईशः सर्वस्य जगतः प्रभुः प्रीणातु विश्वभुक् ॥ १॥

द्विसप्ततितमोऽनुवाकः ।

वाङ् म आसन् । नसोः प्राणः । अक्ष्योश्चक्षुः । कर्णयोः

श्रोत्रम् । बाहुवोर्बलम् । उरुवोरोजः । अरिष्टा

विश्वान्यङ्गानि तनूः । तनुवा मे सह नमस्ते अस्तु मा मा हिंसीः ॥ १॥

त्रिसप्ततितमोऽनुवाकः ।

वयः सुपर्णा उपसेदुरिन्द्र प्रियमेधा ऋषयो नाधमानाः ।

अप ध्वान्तमूर्णुहि पूर्धि चक्षुर्मुमुग्ध्यस्मान्निधयेव बद्धान् ॥ १॥

चतुःसप्ततितमोऽनुवाकः ।

प्राणानां ग्रन्थिरसि रुद्रो मा विशान्तकः । तेनान्नेनाप्यायस्व ॥ १॥

पञ्चसप्ततितमोऽनुवाकः ।

नमो रुद्राय विष्णवे मृत्युर्मे पाहि ॥ १॥

षट्सप्ततितमोऽनुवाकः ।

त्वमग्ने द्युभिस्त्वमाशुशुक्षणिस्त्वमद्भ्यस्त्वमश्मनस्परि ।

त्वं वनेभ्यस्त्वमोषधीभ्यस्त्वं नृणां नृपते जायसे शुचिः ॥ १॥

सप्तसप्ततितमोऽनुवाकः ।

शिवेन मे सन्तिष्ठस्व स्योनेन मे सन्तिष्ठस्व सुभूतेन मे सन्तिष्ठस्व

ब्रह्मवर्चसेन॑ मे सन्ति॑ष्ठस्व यज्ञस्य॑र्द्धिमनु॑सन्ति॑ष्ठस्वोप॑ ते यज्ञ॑ नम॒
उप॑ ते नम॒ उप॑ ते नमः॑ ॥ १॥

अष्टसप्ततितमोऽनुवाकः ।

सत्यं॑ परं॑ परं॑ सत्यं॑ सत्येन॑ न
सुवर्गा॑ल्लोकाच्च्यवन्ते॑ कदाचन॑

सता॑ हि सत्यं॑ तस्मात्सत्ये॑ रमन्ते ॥ १॥

तप॑ इति॑ तपो॑ नानश॑नात्परं॑ यद्धि॑ परं॑ तपस्तद्
दुर्धर्षं॑ तद् दुरा॑धर्षं॑ तस्मात्तप॑सि रमन्ते ॥ २॥

दम॑ इति॑ नियतं॑ ब्रह्मचारि॑णस्तस्माद्दमे॑ रमन्ते ॥ ३॥

शम॑ इत्यरण्ये॑ मुनय॑स्तमाच्छमे॑ रमन्ते ॥ ४॥

दानमि॑ति॒ सर्वाणि॑ भूतानि॑ प्रश॑ सन्ति
दानान्ना॑तिदुष्करं॑ तस्माद्दाने॑ रमन्ते ॥ ५॥

धर्म॑ इति॑ धर्मेण॑ सर्वमिदं॑ परिगृहीतं॑
धर्मान्ना॑तिदुश्चरं॑ तस्माद्धर्मे॑ रमन्ते ॥ ६॥

प्रज॑न इति॑ भूया॑ सस्तस्मात्॑ भूयिष्ठाः प्रजायन्ते॑
तस्मात्॑ भूयिष्ठाः प्रजन॑ने रमन्ते ॥ ७॥

अग्न॑य इत्या॑ह तस्मादग्न॑य आधा॑तव्याः ॥ ८॥

अग्नि॑होत्रमित्या॑ह तस्मादग्नि॑होत्रे रमन्ते ॥ ९॥

यज्ञ॑ इति॑ यज्ञेन॑ हि देवा॑ दिवं ग॑तास्तस्माद्यज्ञे॑ रमन्ते ॥ १०॥

मान॑समिति॑ विद्वा॑ सस्तस्माद्विद्वा॑ स एव॑ मान॑से रमन्ते ॥ ११॥

न्या॑स इति॑ ब्रह्मा॑ ब्रह्मा॑ हि परः॑ परो॑ हि ब्रह्मा॑ तानि॑ वा
ए॒तान्यव॑राणि॑ तपा॑सि न्या॑स ए॒वात्य॑रेचयत् य
ए॒वं वेदे॑त्युपनिषत् ॥ १२॥

एकोनाशीतितमोऽनुवाकः ।

प्राजा॑पत्यो॑ हारु॑णिः सुपर्णे॑यः प्रजा॑पतिं॑ पि॒तर॑मुप॑ससार॑ किं

भगवन्तः परमं वदन्तीति तस्मै प्रोवाच ॥ १॥

सत्येन वायुरावाति सत्येनादित्यो रोचते दिवि सत्यं वाचः
प्रतिष्ठा सत्ये सर्वं प्रतिष्ठितं तस्मात्सत्यं परमं वदन्ति ॥ २॥

तपसा देवा देवतामग्र आयन् तपसार्षयः सुवरन्वविन्दन्
तपसा सपत्नान्प्रणुदामारातीस्तपसि सर्वं प्रतिष्ठितं
तस्मात्तपः परमं वदन्ति ॥ ३॥

दमेन दान्ताः किल्बिषमवधुन्वन्ति दमेन ब्रह्मचारिणः
सुवरगच्छन् दमो भूतानां दुराधर्षं दमे सर्वं
प्रतिष्ठितं तस्माद्दमः परमं वदन्ति ॥ ४॥

शमेन शान्ताः शिवमाचरन्ति शमेन नाकं मुनयोऽन्वविन्दन्
शमो भूतानां दुराधर्षं शमे सर्वं प्रतिष्ठितं
तस्माच्छमः परमं वदन्ति ॥ ५॥

दानं यज्ञानां वरूथं दक्षिणा लोके दातारं
सर्वभूतान्युपजीवन्ति दानेनारातीरपानुदन्त दानेन
द्विषन्तो मित्रा भवन्ति दाने सर्वं प्रतिष्ठितं तस्माद्दानं
परमं वदन्ति ॥ ६॥

धर्मो विश्वस्य जगतः प्रतिष्ठा लोके धर्मिष्ठ प्रजा
उपसर्पन्ति धर्मेण पापमपनुदति धर्मे सर्वं प्रतिष्ठितं
तस्माद्धर्मं परमं वदन्ति ॥ ७॥

प्रजननं वै प्रतिष्ठा लोके साधु प्रजायास्तन्तुं तन्वानः
पितृणामनुणो भवति तदेव तस्यानृणं तस्मात् प्रजननं
परमं वदन्ति ॥ ८॥

अग्नयो वै त्रयो विद्या देवयानः पन्था गार्हपत्य ऋक्
पृथिवी रथन्तरमन्वाहार्यपचनः यजुरन्तरिक्षं
वामदेव्यमाहवनीयः साम सुवर्गो लोको बृहत्तस्माद्दग्नीन्
परमं वदन्ति ॥ ९॥

अग्निहोत्रं सायं प्रातर्गृहाणां निष्कृतिः स्विष्टं

सुहृतं यज्ञक्रतूनां प्रायणं सुवर्गस्य लोकस्य

ज्योतिस्तस्मादग्निहोत्रं परमं वदन्ति ॥ १० ॥

यज्ञ इति यज्ञो हि देवानां यज्ञेन हि देवा दिवं गता

यज्ञेनासुरानपानुदन्त यज्ञेन द्विषन्तो मित्रा भवन्ति यज्ञे

सर्वं प्रतिष्ठितं तस्माद्यज्ञं परमं वदन्ति ॥ ११ ॥

मानसं वै प्राजापत्यं पवित्रं मानसेन मनसा साधु

पश्यति मनसा ऋषयः प्रजा असृजन्त मानसे सर्वं प्रतिष्ठितं

तस्मान्मानसं परमं वदन्ति ॥ १२ ॥

न्यास इत्याहुर्मनीषिणो ब्रह्माणं ब्रह्मा विश्वः कतमः

स्वयम्भूः प्रजापतिः संवत्सर इति ॥ १३ ॥

संवत्सरोऽसावादित्यो य एष आदित्ये पुरुषः स परमेष्ठी ब्रह्मात्मा ॥ १४ ॥

याभिरादित्यस्तपति रश्मिभिस्ताभिः पर्जन्यो वर्षति

पर्जन्येनौषधिवनस्पतयः प्रजायन्त ओषधिवनस्पतिभिरन्नं

भवत्यन्नेन प्राणाः प्राणैर्बलं बलेन तपस्तपसा श्रद्धा

श्रद्धया मेधा मेधया मनीषा मनीषया मनो मनसा

शान्तिः शान्त्या चित्तं चित्तेन स्मृतिः स्मृत्या स्मारं

स्मारेण विज्ञानं विज्ञानेनात्मानं वेदयति तस्मादन्नं

ददन्सर्वाण्येतानि ददात्यन्नात्प्राणा भवन्ति भूतानां

प्राणैर्मनो मनसश्च विज्ञानं विज्ञानादानन्दो ब्रह्म योनिः ॥ १५ ॥

स वा एष पुरुषः पञ्चधा पञ्चात्मा येन सर्वमिदं

प्रोतं पृथिवी चान्तरिक्षं च द्यौश्च

दिशश्चावान्तरदिशाश्च स वै सर्वमिदं जगत्स

स भूतं स भव्यं जिज्ञासकृत् ऋतजा रयिष्ठाः

श्रद्धा सत्यो महस्वान्तमसोपरिष्ठात् । ज्ञात्वा तमेवं

मनसा हृदा च भूयो न मृत्युमुपयाहि विद्वान् ।

तस्मान्त्र्यासमेषां तपसामतिरिक्तमाहुः ॥ १६॥

वसुरण्वो विभूरसि प्राणे त्वमसि सन्धाता ब्रह्मन् त्वमसि
विश्वसृतेजोदास्त्वमस्यग्रेरसि वर्चोदास्त्वमसि सूर्यस्य
द्युमोदास्त्वमसि चन्द्रमस उपयामगृहीतोऽसि ब्रह्मणे त्वा महसे ॥ १७॥

ओमित्यात्मानं युञ्जीत । एतद्वै महोपनिषदं देवानां
गुह्यम् । य एवं वेद ब्रह्मणो महिमानमाप्नोति तस्माद्ब्रह्मणो
महिमानमित्युपनिषत् ॥ १८॥

अशीतितमोऽनुवाकः ।

तस्यैवं विदुषो यज्ञस्यात्मा यजमानः श्रद्धा पत्नी
शरीरमिध्ममुरो वेदिलोमानि बर्हिर्वेदः शिखा हृदयं यूपः
काम आज्यं मन्युः पशुस्तपोऽग्निर्दमः शमयिता दानं
दक्षिणा वाग्घोता प्राण उद्गाता चक्षुरध्वर्युर्मनो ब्रह्मा
श्रोत्रमग्नीत् यावद्धियते सा दीक्षा यदश्राति
तद्धविर्यत्पिबति तदस्य सोमपानं यद्रमते तदुपसदो
यत्सञ्चरत्युपविशत्युत्तिष्ठते च स प्रवर्ग्यो यन्मुखं
तदाहवनीयो या व्याहृतिराहुतिर्यदस्य विज्ञानं तञ्जुहोति
यत्सायं प्रातरत्ति तत्समिधं यत्प्रातर्मध्यन्दिनं सायं
च तानि सवनानि ये अहोरात्रे ते दर्शपूर्णमासौ
येऽर्धमासाश्च मासाश्च ते चातुर्मास्यानि य ऋतवस्ते
पशुबन्धा ये संवत्सराश्च परिवत्सराश्च तेऽहर्गणाः
सर्ववेदसं वा एतत्सत्रं यन्मरणं तदवभृथ एतद्वै
जरामर्यमग्निहोत्रं सत्रं य एवं विद्वानुदगयने प्रमीयते
देवानामेव महिमानं गत्वादित्यस्य सायुज्यं गच्छत्यथ यो
दक्षिणे प्रमीयते पितृणामेव महिमानं गत्वा चन्द्रमसः
सायुज्यं गच्छत्येतौ वै सूर्याचन्द्रमसोर्महिमानौ ब्राह्मणो
विद्वानभिजयति तस्माद् ब्रह्मणो महिमानमित्युपनिषत् ॥ १॥

ॐ शं नो मित्रः शं वरुणः । शं नो भवत्यर्यमा । शं

न॒ इन्द्रो॑ बृह॒स्पतिः॑ । शं॒ नो॒ विष्णु॑रुरु॒क्रमः॑ ।
नमो॑ ब्रह्म॒णे । नम॑स्ते वायो । त्वमे॒व प्र॒त्यक्षं॑ ब्रह्मा॒सि ।
त्वामे॒व प्र॒त्यक्षं॑ ब्रह्मावादिषम् । ऋ॒तम॑वादिषम् ।
स॒त्यम॑वादिषम् । तन्मा॒मावीत् । तद्व॒क्तार॑मावीत् । आ॒वीन्माम् । आ॒वीद्व॒क्तारम् ॥
ॐ सह॑ नावतु । सह॑ नो॒ भुनक्तु॑ । सह॑ वी॒र्यं॑ करवावहै ।
ते॒जस्वि॑ नावधीतमस्तु । मा वि॒द्विषा॑वहै ॥
ॐ शान्तिः॑ शान्तिः॑ शान्तिः॑ ॥

It appears that Mahanarayana Upanishad was also known as Yajnikyopanishad, and same as Taittiriya Aranyaka Prapathaka 10. Neither Narayana U. nor Tripad-Mahanarayana U. correspond to this. U-B's bhashya makes no mention of this. It is not mentioned in Muktika U. list of 108 U.

Original text Encoded and proofread by Sunder Hattangadi
. Accents by Mandar Mali

—
Mahanarayana Upanishad with Vedic Accent
pdf was typeset on August 14, 2023
—

Please send corrections to sanskrit@cheerful.com

